

I OPŠTE ODREDBE

Član 1. (Predmet uredbe)

Ovom uredbom uređuje se način ostvarivanja pripravničkog staža, način i uslovi polaganja stručnog ispita, imenovanje i sastav komisije za polaganje stručnog ispita, sadržaj ispita, izdavanje uvjerenja o položenom stručnom ispitu, vođenje evidencije o položenom stručnom ispitu nastavnika, stručnog saradnika i saradnika i odgajatelja u ustanovama predškolskog, osnovnog i srednjeg obrazovanja, internatima i domovima učenika, na području Tuzlanskog kantona, u cilju postavljanja i dostizanja evropskih standarda u stepenu stručne pripremljenosti za rad.

Član 2. (Definisanje pojmova)

Predškolska ustanova je javna ili privatna ustanova predškolskog odgoja i obrazovanja, kao početnog stepena jedinstvenog sistema odgoja i obrazovanja.

Škola je javna ili privatna ustanova osnovnog ili srednjeg odgoja i obrazovanja, dom učenika i internat koji mogu biti u sastavu srednje škole a kojima je primarna djelatnost obrazovanje i odgoj učenika.

Nastavnik je lice koje ima odgovarajući profil i stručnu spremu propisanu nastavnim planom i programom (u daljem tekstu: NPP) za obavljanje poslova izvođenja nastave u osnovnoj i srednjoj školi.

Stručni saradnik je lice stručno za obavljanje poslova radnog mjesta: bibliotekar, defektolog, pedagog, pedagog-psiholog, socijalni radnik, psiholog, ljekar i dr.)

Odgajatelj u predškolskim ustanovama je lice stručno za realizaciju različitih programa predškolskog odgoja i obrazovanja u predškolskim ustanovama.

Odgajatelj u internatima i domovima je lice koje radi poslije redovne nastave sa učenicima smještenim u internatima i domovima po posebnom programu u svrhu odgoja.

Saradnik je lice koje učestvuje u odgojno-obrazovnom radu i obavljanju poslova pod neposrednim rukovodstvom nastavnika.

Pripravnik je lice koje prvi put zasniva radni odnos u struci za koju se obrazovalo radi stručnog osposobljavanja za samostalan rad, na vrijeme trajanja pripravničkog staža.

Volonter je lice sa odgovarajućom stručnom spremom, koje se osposobljava za samostalan rad u zanimanju za koje se obrazovalo, bez zasnivanja radnog odnosa (volonterski rad).

Mentor je lice koje podržava, nadzire i prati rad pripravnika/volontera, tokom pripravničkog staža, radi osposobljavanja za samostalan rad.

Komisija je stručno tijelo koja provodi postupak polaganja stručnog ispita (posebni i opći dio).

Uvjerenje o položenom stručnom ispitu je javna isprava koja se izdaje licu koje je položilo stručni ispit.

Pedagoško-psihološko i metodičko-didaktičko obrazovanje je dopunsko obrazovanje i osposobljavanje lica za rad na poslovima odgoja i obrazovanja, koji u toku studija nisu položili ispite iz pedagogije, psihologije, didaktike i metodike nastave.
